

Voorwoord

'n Persoonlike woord vir jou

Liewe kategeet

Welkom by die graad 2-kategeese. Jy is nie maar net 'n kategeet wat onderrig gee nie, jy is deur God geroep om in sy Koninkryk diensbaar te wees. Jy is besig om kinders wat aan jou toevertrou is, dissipels van Jesus te maak. Dit is nie net 'n groot verantwoordelikheid nie, maar ook 'n groot voorreg. Begin deur jou kinders te leer ken. As dit moontlik is, gaan besoek hulle by hul huise. Leer die ouers en kinders persoonlik ken. So sal jy insig kry in elke kind se omstandighede en behoeftes. Gee om en wees lief vir hulle. Bid vir al jou kinders. Wees vir hulle 'n voorbeeld in woord en daad. Dit is belangrik dat jy ook voortdurend sal groei in jou verhouding met God. Vertrou die Here dat Hy jou sal gebruik as 'n instrument in sy diens. So sal jy as kategeet ook die vrug van die geloof in elkeen raaksien en daardeur geseën word.

Die stof is so saamgestel dat dit jou in staat sal stel om die les volledig te kan aanbied. Neem ook vrymoedigheid om die lesse met praktiese voorbeelde en kreatiwiteit en inisiatief aan te vul. Maak seker dat die kinders na elke les ook weet wat daar van hulle vir die volgende Sondag verwag word.

Laat elke kind voel dat hy of sy spesiaal is. As daar 'n kind is wat sukkel, wees geduldig en gee erkenning waar dit nodig is. Onthou elkeen se verjaardag. Wanneer daar siekte of hartseer is, deel dit met almal en laat hulle saam bid vir die persoon. Ontwikkel 'n gesindheid van omgee vir mekaar.

Mag die Here jou seën met gawes en insig om so met die kinders te werk dat nie net hulle in die geloof sal groei nie, maar ook jy!

Ds Rudi Rust
Hoofsamsteller

'n Paar gedagtes van die hoofredakteur

Iewers het ek gelees die enigste onreg wat jou nie vergewe gaan word nie, is die onreg wat jy 'n kind aangedoen het. Aan die ander kant: Die edelste ding wat 'n mens kan doen, is om 'n kind aan die Here Jesus voor te stel. 'n Baie groot voorreg het jou dus te beurt geval. Dit is om kinders se geloof in die Here te help bou. Die Heilige Gees wil jou vir hierdie grootse taak gebruik. Jy is daar om kinders bewus te maak van God se liefde. Sy liefde moet hulle só vertrou en bemoedig dat hulle met oorgawe hul lewens aan Hom wil wy. Die Here gebruik jou om van sy liefde te vertel, maar ook om dit uit te deel.

Onthou, ons is maar net skakels, net instrumente wat God gebruik om sy wonderlike werk te doen. Daarom kan jy nie hierdie werk doen sonder om te bid nie. Hy roep jou, Hy maak jou bekwaam, Hy rus jou toe, Hy gee jou die gesag. Hou jou persoonlike verhouding met Hom in stand. Bid gereeld.

Geniet dit om vir die Here en sy kinders te lewe!

So werk die kategese

Elke les in hierdie boek is vir jou gerief volledig uitgewerk. Tog is dit belangrik dat jy elke les deeglik by die huis sal voorberei. Party weke sal jy hulpmiddels en klaswerkstukke moet maak.

Al die lesse is presies dieselfde saamgestel. Bly ter wille van eenvormigheid en roetine daarby. Dit wat bekend is, laat jou en die kinders veilig voel. En wat uiters belangrik is: Die primêre doel van kategese is om die persoonlike verhouding wat God met sy kinders kom vestig het, uit te brei en te versterk binne die huisgesin en die gemeente.

Om hierdie persoonlike verhouding in stand te hou, is die Bybel onontbeerlik, daarom moet dit in elke klas gebruik word. Laat die kinders sien die Bybel word gebruik, al lees jy nie die verhaal of teks elke keer direk daaruit nie. Plak byvoorbeeld deur die loop van die jaar plakertjies by die tekste wat gebruik word om aan die einde van die jaar te kan sien hoeveel keer julle die Bybel gebruik het.

Wat registerhouding betref, bly elke kategeet by die reëls wat in hul gemeente geld.

Hierdie kategesehandleiding is so saamgestel dat elke les dieselfde struktuur volg. Met die gedeelte MEER INLIGTING word jy begelei om 'n redelike agtergrond te kry oor dit wat in die les aangebied word. Feite uit MEER INLIGTING word saamgevat in IETS BELANGRIK sodat die kern van die les ingeskerp kan word.

Die kategesereeks waarvan hierdie boek deel is, werk op die volgende basis: Daar bestaan drie fasegroepe van graad R tot by graad 10. Grade R tot 3 vorm die eerste fase, grade 4 tot 7 die tweede fase, en die laaste fase is grade 8 tot 10. Daar word deurgaans vier tipes lesse in elke boek vir alle grade aangebied.

- **Graadles**

'n Graadles is 'n les wat vir die kinders van daardie spesifieke graad geskryf is. Dit is 'n *gewone* les soos ons dit altyd geken het en word op die *gewone* manier aangebied. Die getal lesse wissel van twee tot drie per kwartaal. Waar daar net twee lesse is, is die derde een altyd 'n hersieningsles.

- **Gesinsles**

Vir hierdie les is dit belangrik om te onthou dat gesinne op verskillende maniere saamgestel is. In jou klas kan daar kinders uit 'n tradisionele of normale gesin wees met 'n pa en 'n ma. Daar kan enkelouergesinne wees. Dit is wanneer die kinders vir die meeste van die tyd net by 'n pa of 'n ma woon, of om die beurt een naweek by die pa en een naweek by die ma. Ook oumas en oupas, ooms en tannies en selfs ander familie of vriende kan saam met kinders 'n gesin vorm. In baie gevalle is dit selfs net 'n oupa of 'n ouma, 'n oom of 'n tannie, ensovoorts. Daar is selfs gesinne waar die "ouers" persone van dieselfde geslag is. Die woorde *gesin* en *ouers* word in hierdie boek gebruik vir enige van hierdie soorte "gesinne". Onthou ook dat al die lede van die "gesin" vir 'n kind belangrik is, al bly hulle nie noodwendig in dieselfde huis nie.

'n Gesinsles word een keer per kwartaal aangebied. In die lig hiervan moet ouers daaraan gewoon gemaak word om as deel van die nakoming van hul doopbelofte hierdie deel van die kategese saam met hul kinders deur te maak. 'n Gesinsles is altyd so saamgestel en word so

aangebied dat die hele gesin daarby betrokke raak. Daar moet gepoog word om ten minste die ouers by so 'n geleentheid te betrek, maar aangesien die kind deel is van 'n gesin, sal dit goed wees as ander lede van die gesin ook die geleentheid kan bywoon, indien moontlik. Die fokus van hierdie lesse val op gesins- en ouer-kind-verhoudings. Die betrokkenheid van gesinne in die hele gemeente-opset word ook hier veronderstel. Omdat die ouers moet weet wanneer hulle die lesse moet bywoon, moet kategete reeds aan die begin van die jaar datums aan die ouers voorsien en hulle kort voor die les weer herinner.

- **Faseles**

Faselesse word vir al die kinders van 'n spesifieke fase aangebied: graad R tot graad 3, of 4 tot 7, of 8 tot 10. Hier val die klem op gemeenskaplike sake wat relevant is vir kinders van daardie ouderdom of fase. Aldrie of alvier kategete van 'n spesifieke fase moet dus seker maak dat roosters nie bots nie en wie verantwoordelik gaan wees vir die aanbieding van daardie les. Ter wille van die samehorigheidsgevoel en dissipline, moet aldrie of alvier kategete teenwoordig wees wanneer die les aangebied word.

'n Slotwoord van my kant af: Mag jy vanjaar met jou betrokkenheid by kinders krag, insig, geloof en verantwoordelikheid van die Here ontvang. *In Christus se voetspore* sit jy deur die leiding van die Heilige Gees as't ware ook jou arms om kindertjies, lê hulle die hande op en seën hulle. So verkry jy 'n eervolle plek in die gemeente, groot sekerheid in jou geloof in Christus Jesus, en sal jy na hierdie lewe deel in die vreugde van jou Here.

Dr Hannes Beukes
Hoofredakteur